

《大方廣圓覺修多羅了義經導讀》補充講表

◎附表二十七（以下糅合諦閑大師《圓覺經講義親聞記》）

○於是彌勒菩薩在大眾中，即從座起，頂禮佛足……五體投地，如是三請，終而復始。

◆初一行半，是眾中具儀可知。大悲下，謝前成信。謂約法則廣為現會，約益則廣為未來，故稱大悲世尊。法喻重重，故云：廣為。覺性覆在輪迴中，非機不說，縱說亦不致明了，故云：秘密藏。因剛藏伸難，如來一一明示，故云：開也。深悟句，謂深悟種種取捨，皆是輪迴。前文訶斥等語，皆辨邪正意耳。

◆現前四依，以此大教流通當世，即是代佛施生之能也。眾生，約發菩提心修圓覺者而言。道眼：即辨析邪正之眼，指正慧也。此眼不明，焉保歧途不入？無有是處。今蒙如來上來開示，則能子賊分明，家寶無畏也。大涅槃至佛果方證，今雖未證，則無復懷疑，故曰：生決定信。由此進修，可免生死，不致重隨輪轉境界，起循環見矣！

◆世尊若諸下，是請後也。分二：先備陳所請。菩薩眾生，舉所被之機。大寂滅海：即前文圓覺境界。前云入，此云遊者，謂解行相成，任運而入，自在如遊戲也。前章佛示以先斷輪迴根本。大士意謂：我等已聞此意，尚恐初學未能領會，故爾代問。

◆云何當斷，此總陳也。別陳復具三義：一、於諸輪迴，有幾種性。二、修佛菩提，幾等差別。三、迴入塵勞，當設幾種教化方便。至後如來答處自見。唯願下，正請希悟。唯願者，顯願之專。餘皆不願，獨願此一件事也。既接現前，復拯末世，斷愛欲因，出輪迴苦，名為救世大悲。不捨：慇懃繫念，乾乾不息也。慧目即道眼。不馳外境曰：肅；肅：莊嚴也。無多內染曰：清。清、淨也。用斯成觀，自能照曜心鏡。謂以正慧為能照，以心鏡為所照，即心地開通義也。心地開通，則無所不知，無所不見，故曰：圓悟無上知見。作是下四句，顯慇懃可知。（乾乾不息：自強不息的樣子）

◆此章所言，於我們凡夫，最為切要！蓋凡夫所患，即是不能斷愛欲，用功宜從此下手。彌勒恐末世眾生聞輪迴根本之言，而不知斷法，故代為請問。

◆斷輪迴根本，首在離障。障有三：一煩惱障。二業障。三報障。因此三障纏繞，圓覺性乃不得顯。此云二障者，煩惱障即事障，所知障即理障。由此二障，造業招報，輪轉生死。故障不離，則性不顯。然此性本人人同具，凡夫迷之而不減，聖人證之亦不增。

◆如來說法，必依四悉檀。令眾生得益。一世界悉檀。令人得歡喜益。二為人悉檀。令人得生善益。三對治悉檀。令人得破惡益。四第一義悉檀。令人得入理益。彌勒即謝前所聞之法，能令大眾得此益也。大涅槃，是我家藏之寶。從此自悟，可以自受用，不畏賊竊，故曰：無畏。大寂滅海，即前文圓覺性。前言入，乃是悟入；今云遊，乃是修證。悟入屬解，修證屬行。三種陳請者，一、自初學佛以至成佛，動經塵劫。當其未了生死根本之際，不知於諸輪迴中，有幾種性。二、發無上菩提心，修無上菩提行，不知中有幾等差別。三、欲證菩提，必度眾生，故須迴入塵勞。但不知有幾種教化方便。戒定慧名三道。故慧目即道眼。慧目為能照，心鏡為所照。照耀心鏡，即是教人修觀。我心如

鏡，慧目亦如鏡，互相映澈，所謂光光相射也。無上知見，即佛之正知正見。所謂三智（一、一切智，即聲聞緣覺之智。二、道種智，即菩薩之智。三、一切種智，即佛之智。）一心。五眼——肉眼、天眼、慧眼、法眼、佛眼。——一見也。

○爾時，世尊告彌勒菩薩言：「善哉！善哉！善男子……及諸大眾，默然而聽。」

◆寂滅海唯佛獨證，故稱如來深奧。眾生久隱情識，佛亦常不開演，故稱祕密。一悟則輝天鑑地，等佛知見，故又以微妙稱之。現前聞之，欲愛不萌於心，故曰：潔清慧目。傳之末世，生死不繫於眾，故云永斷輪迴。正慧分明，照曜心境，故云：心悟實相，實相即真空理也。悟此理者，直證無生，於無生理，忍可於心，故云具無生忍。餘可知。

◆如來深奧祕密微妙，乃佛果上自受用功夫；唯佛獨證，無人能知無人能到。彌勒代眾請問，即欲如來將自受用境界，令眾生一同受用也。眾生因三惑所障，見思障慧眼，塵沙障法眼，無明障佛眼，故慧目不清。實相，即寂滅海之異名，即真空理也。無生忍，眾生未

嘗不有，故云具。初地菩薩得少分光明。八地以上得究竟證。圓教則初住亦證無生忍。

○善男子！一切眾生從無始際，由有種種恩愛貪欲，故有輪迴。

◆無始：指晦昧真心以來。晦昧真心，轉變妄想。恩愛貪欲，由茲繁興，故以種種言之。恩有二：一、報上之恩，如父母師長。二、惠下之恩，如子孫男女。然有恩即有愛，或愛上貪財物，欲行孝敬；愛下貪利祿，欲全育養。凡此皆牽連生死，招致往復。故云：由有種種恩愛貪欲，故有輪迴。此愛欲為輪迴之本，已略明矣。

◆輪迴不但六道眾生有之，即出世三聖亦不免。六道眾生，受分段生死。生生死死，循環不已。二乘聖人，生滅滅生，其相微細，則有變易生死。諸大菩薩，無明未盡，亦在輪迴之中。六道凡夫，恩愛貪欲，麤而易知。出世三聖，恩愛貪欲，細而難知。自最初一念不覺晦昧圓覺真心時，由是迷本覺為不覺，蔽妙明為無明；由無明變現妄想，以生恩愛貪欲。所以世尊割愛出家，先斷貪欲，以其為輪迴根本故。愛之一字，九界皆有之。

不論眾生，二乘聖人，欣涅槃，厭生死，亦是愛憎。諸大菩薩，求神通，有法愛。不過凡夫是事愛。聖人是理愛。事愛招分段生死，理愛感變易生死。

○若諸世界一切種性：卵生、胎生、濕生、化生……當知輪迴，愛為根本。

◆上雖略明，語意含蓄，恐眾不了，故復明明詳示。首句先舉依報。次舉正報。一世界如是，多世界亦如是，故云：若諸世界。一眾生如是，多眾生亦如是，故云：一切種性。

如楞嚴十二類，今則但舉四生。經云：卵唯想生，胎因情生，濕以合感，化以離應。又云：動顛倒故，和合氣成，飛沈亂想，故有卵。欲顛倒故，和合滋成，橫豎亂想，故有胎。趣顛倒故，和合煖成，翻覆亂想，故有濕。假顛倒故，和合觸成，新故亂想，故有化。此種等類，凡有性體有形命者，莫不以婬愛之因為正成，故云：皆因婬欲而正性命。四生皆是果報，總以情想為因心，情想即是欲愛，故為輪迴之本。此應當警覺而知之也。